



唐宋舊經樓詩稿卷四

阮孔璐華經樓



題水村圖

水外山村尺幅中一般風景與誰同
江天縹緲湖天濶漁笛往來吹晚風
漁人多少此間住柳下橫塘飛白鷺
紅蓮花落蓼花開山光一抹蒼烟暮
幽居長此可消閒多少柴門半掩關
城市風塵渾不識夕陽日照溪山蟹
舍鴨欄圍小院春去秋來景無變
詩人如向此中居除却持竿惟把卷
我看

圖畫憶湖莊
水木依稀似草堂
欲駕扁舟訪秋去
卸帆直到小樓旁

和翠屏洲女史見寄韻

遙識幽亭外
江光接雲嶺
應有采蘭人
秋花同采茗
瑤箋忽寄來
遠景惟心領
何日再來遊
山色金焦并

試龍涎香

虛齋共坐焚龍涎
氤氳撲鼻浮輕烟
翠縷結成似雲氣
吹噓一抹通晴天
此香若從何處出
廣州海

外蛟龍淵下有老龍
潛海底其涎湧出如冰
鮮風吹日爍年更久
結成汎水滲沙堅
有時龍去雲霧散
鮫人擎出論金錢
我今焚此和檀劑
絲絲細裊芸窗前
更聞一剪分兩縷
試之以剪殊未然
鼻觀靜聞微妙處
香前正好聯詩篇
秋暑正酷晚雷起
恐有鱗爪來雲邊

寄書之宜人珠湖草堂

夜來風雨滿檐前
不識行人可泊船
更想嬌兒年並幼
愁心至曉未曾眠

君住湖莊八月秋山光水影可消愁遙知暇日渾
無事半是吟詩半倚樓

送夫子除服

陛見

念君不日別家園整頓行裝重致言從此墓田休
再戀但將心力答

皇恩

千里關山憶遠人行程正是小陽春未知節鉞臨
何地且向京華作近臣

偶成二首邀書之宜人和之

兒女嬌癡送父行金環愛爾最聰明含悲更問小
兄弟何日隨親共到京

看兒行止具天才嬉戲庭前笑口開願汝他年如
父學鳳凰池上折花來

初冬書室偶作

紅爐鶴炭早安排惟恐寒風入戶來菊臥殘枝霜
色淺竹搖疎影日光回爲評佳茗琴絲靜偶寫新
詞硯匣開惟有書齋閒坐可一生常自愧無才

殘菊

重陽才過未多時風散殘英入石池
冷淡香痕無定處誰憐窗下小橫枝
離披更怯五更寒墜素垂紅未忍看
黃蝶驚霜飛去也落英無力壓欄干

家廟白皮松

古松階下立積翠影籠蔥罩地垂青
靄橫空起白虹蒼蒼懷玉骨鬱鬱老
仙風更與冬青樹同齊廟字中

題琅嬛仙館圖

閒對琅嬛仙館圖圖中佳境更何如
松篁繞屋千重翠文字盈樓萬卷書
張華昔日多書記仙界洞天夢中至
問言此處是何鄉道是琅嬛古福地
漢時晨肇入天台惟見桃花玉女來
那及茂先游此地奇書古籍興悠哉
我家書館題雙字巧借張華夢中事
此圖仙館盡圖書本有晉朝博物志

聞夫子被

御賜蟒服四事文房四事却寄

天上遙知賜錦袍
鳳池珥筆擁豐貂
官清耐得君恩重
一片冰心答

聖朝

再寄一首

西城

賜第景依然
此日重凭舊畫欄
月影窺窗清漏永
雁聲繞樹小樓寒
頻添鴿炭依爐坐
閒襲芸香展卷看
料得主人悲往事
墓田千里路漫漫

新婦于歸口占寄外

新婦于歸已二旬
從容處事更能吟
深如我意如君意
千里殷勤報喜音

錦帳高懸對碧紗
娉婷容得衆人誇
始知女士多幽靜
不愧詩書舊宦家

和夫子寄詩韻

庭梅將放臘初殘
把卷無言懶再看
幾載未能歸闕里
連朝更覺憶長安
窗前寂寞銀屏冷
檐外丁冬鐵馬寒
忽接瑤箋讀新韻
和成應已日三竿

原韻

唐詩卷四
五
留香小室地爐殘接得鄉書耐細看但覺詩篇
皆靜好遙知兒女各平安江南却共挑燈夜
闕下休愁待漏寒八載前栽窗外竹平安也報
兩三竿

雷塘菴種梅

雷塘菴外不聞喧種得梅花似小園荒徑雪霏無
俗韻疎籬月照有冰魂清香淡淡繞茅舍幽艷稜
稜對墓門我自閒看莫攀折傷心更覺慕 親恩
哭淨因黃夫人

生來才德性從容能儉能勤孰與同比似孟光應
不愧古人詩禮舊家風
屈指同盟已五年衙齋清課共詩篇別來幾日渾
忘寐抱病人愁歲晚年
傳來凶耗突驚心不覺傷心淚滿襟莫向窗前開
畫匣此詩已是故人吟

雷塘辭歲有感

遙望雷塘已斷腸銜哀無語對斜陽但悲今歲依
親墓何忍明年別故鄉獨有長松圍壠畝空將清

唐詩卷四
六
淚濕衣裳愁心自古原無盡惟是終天最可傷

除夕

忽聞爆竹過樓前兒女團圍夜未眠最喜春回雲
影外還愁歲改鬢絲邊坐消今夕思千里佇待來
朝又一年却憶主人持節去梁園雪後雁來天

元日試筆

家家歌管慶新時初覺東風拂繡帷案上爐烟香
淡泊鬢邊絲勝影參差蘭閨不用迎春酒鈴閣閒
吟樂歲詩試向選樓欄外看梅花應放兩三枝

文選樓望雪

選樓小坐凝清寒龍涎焚罷香初殘連朝日色頗
晴好天邊忽見雲漫漫六花檻外漸飛舞階下點
點冰花團却如春絮不肯定又若梅蘂枝頭攢憑
高望遠靜烟樹一白頓覺天地寬城闌高下屋鱗
次應知歲稔民心歡閉窗攤書呼女伴擘箋覓句
頻相看

題雷塘菴主小照

閒庭清似水曉起覓詩篇几上有圖畫展卷心已

虞圖中見小象依稀貌悽然先隴在雷塘夫子常
居焉種樹圍墓外建坊對墓前臨風欲垂淚銜哀
恨終天棕履霜露濕筓笠日影圓倏然遠城市風
景亦似仙回想宦遊人勞勞誠可憐惟此桑榆間
守墓應三年除服却從政何能在墓田仰蒙
君恩重力任此仔肩常見憂民心朝夕皆拳拳哀
哉辭丙舍傷心淚涓涓親友不知愁反謂多纏綿
丁卯初冬時北上清淮船四十有四齡此象永家
傳

平山泛舟

十里平山任溯洄半多水竹半樓臺嵐光縹緲湖
光遠花影參差燕影來詩社綠楊皆已老篠園紅
藥未曾開宛然一幅江南畫風景依稀不忍回
輕搖雙槳送舟行水過虹橋似鏡平綠樹千章青
堞繞紅欄一字碧波橫溶溶春色蘭風暖暗暗幽
香竹徑清他日宦游談故土敲詩還共憶蕪城

燕剪

差池翠尾繞書幃輕受東風力尙微弱柳斜時疑

截線晴絲斷處似投機
拆開杏雪渾無跡
裁破梨雲儘自飛
多少春愁刪不盡
製成王謝舊烏衣

清晏樓

小樓新起對吳山
九曲欄干盡日閒
多少亭臺如畫裏
斜陽影護萬松關

綠陰如水映窗紗
桂葉參差竹影斜
忽憶選樓樓外景
東風開過牡丹花

朝嵐暮靄翠屏開
月影霞光綺戶催
絕似微之詩句好
一家終日在樓臺

清晏樓晚眺

小住樓臺共一家
迴廊閒倚更烹茶
風搖簾角聞清籟
雨過簷牙見落花
四面新陰籠曲檻
滿窗爽氣透輕紗
東堂不隔西樓月
翹首遙看燭影斜

病後口占

小病慊慊一月餘
身孱無力住幽居
圖書滿架簾櫳靜
懶向窗前理蠹魚

屈指離親又五年
慈顏回憶每心懸
白雲千里登樓望
魯越山川各一天

題先姑林太夫人石屋藏書圖

敬題藏書圖盥手展卷軸開圖心更傷
先姑倚書屋端巖坐幽居風景滿清目
詩書藏石室庭前蔭桐竹夫子尙幼年侍
親捧書讀我舅因遠遊慈訓嚴且肅
夫子本好學顯親與宗族哀哉孝思純
每憶慈親哭命吾當勤儉往蹟說心
曲詩書親口傳典衣買薪粟常自憶昔時
抱恨意未足我聞惟淚下哽咽對清燭
未得侍慈顏百身何所贖銜哀拜遺容
濡豪更奠祝

和書之宜人綠陰原韻

綠窗風氣定薄影染羅衣著瓦青陰滿如山翠色
圍依依籠竹瘦淺淺罩苔肥相伴幽人賞還疑夕
照微

夏日

覓句餘閒覺晝長湘簾捲起襯斜陽深深庭院紗
厨靜寂寂軒窗紙閣涼蕉葉初分添綠影松風微
度送清香依稀疑是家鄉景萬卷書樓舊墨莊

題月莊女史畫扇

筆寫蕉花深淺紅更圖簷蔔襯薰風妙香艷色皆
清暑一蝶斜飛入扇中

懷王凝香二妹

堂前妯娌兩心投因薦蘋蘩君獨留數載倚窗同
覓句一朝分袂此登樓停雲江水遙相憶暮樹吳
山更覺愁却爲懷君特拈韻小年夏日似三秋

憶曲江亭簡翠屏洲諸女史

金焦山北曲江邊亭外江湖到岸前露濕稻花香
細細風生竹韻影娟娟近愁暑雨迷吳岫遙憶雲

光接楚天自別詞人今二載殷勤重與寄詩篇

窗前桂樹上有白頭翁鳥一雙來巢

白頭雙鳥擇巢棲並作新檜壓木犀愛爾珍禽窗
外立不隨紫燕共銜泥

望晴

盥手虔誠拜佛前却因久雨慮農田風敲竹檻頻
鏗爾雲罽書窗倍闇然鎮日愁懷侵夢寐連朝無
計懶詩篇惟求早見晴光放天慰民心民感天

讀夫子哭壯烈伯李忠毅公詩感賦

夫子言公粵海征掛帆親手掣長鯨生前不愧勤
王事死後真傳報

國名耿耿忠魂懸月魄森森正氣作星精今朝持
節重居此更與何人共議兵

卽事

清晏樓前小坐時一甌香茗碧參差爐烟縹緲琴
書靜對此幽居合賦詩

深深院落寂無聲點點流螢乍滅明竹影蕭森燈
影白最宜窗下共楸枰

疎影梧桐七月秋天街如水夜光流一輪明月懸
簾外風景依稀似選樓

曲屏

半隔斜陽半隔風隨心宛轉遜玲瓏依依皆稱新
題句面面多宜好畫工排去剛遮方几榻折來又
作小房櫳書窗穩護詩人背彷彿迴欄却不同

回欄

碧城如畫襯斜陽卐字冰文界短牆花院月來重
見影竹廊人靜暗生香半因繞柱時時轉多爲巡

簷得得長幾度閒凭何所事依稀却似九迴腸

和書之宜人寄詩原韻

却因兒病到揚州獨住鄉園更覺愁接得瑤箋如
面語別來幾日似三秋

秋風秋雨滿簷前一樣愁心兩地牽遙憶主人臨
海上樓船辛苦每無眠

懷書之宜人

選樓忽見桂花枝遙憶衙齋有所思小住家園翻
作客懶裁書簡但吟詩紗窗月照牙籤靜紙閣風

來燈穗垂浙水吳山千里遠懷人應聽漏聲遲

重陽

秋光不覺又重陽小坐攤書逸興長雨濕庭前桐
葉瘦風搖窗外菊花香懷君但理

國家事笑我偏因兒女忙惟有思親心更遠白
雲千里路茫茫

回杭州

歸來不覺小陽春聚首依依笑語頻最喜嬌兒身
已健焚香盥手謝明神

題張淨因黃夫人遺稿

五載相親道可師
今朝別我去何之
臯亭花滿春前賞
邗水蘭枯膝下思
辛苦一生心並見
惠賢兩字世皆知
最憐茶熟香溫候
誰向清齋共詠詩

落葉聲

幾樹梢森霜正酣
一番搖落又何堪
人驚宿鳥依稀似
風動牙籤仔細參
瓦畔蕭蕭飛小院
石邊颯颯墜幽龕
空林莫訝新寒緊
十月梅花漸可探

新雁聲

幾度西風作晚涼
雁聲初接碧天長
叫來江上橫秋水
唳向雲中背夕陽
入夜那堪驚短夢
凌空應已帶新霜
飛過樓角原無意
不料餘音繞畫梁

題書之宜人靜春居圖

文選樓中好畫圖
靜春佳境更何如
古碑尙有千年石
賢母曾留萬卷書
但覺花光圍檻滿
最宜芸馥透窗虛
宋人史集分明見
劉氏遺莊卽我居

西湖十景詩

白香山西湖詩云
皇恩只許住三年
予家

受

皇恩住西湖已九年矣因作十景詩十首並令閨友兒婦同作繪冊題之

蘇隄春曉

西湖一帶曉春天曙色韶光最可憐
風柳岸邊留淡月露花橋上歛
朝烟樓臺縹緲迎初日雲樹參
差憶昔年多少詩人遊騎早碧桃林下說坡仙

雙峯插雲

南北峯高接碧空雙雙爭聳白雲中
藏來螺黛渾

疑雪擘破兜羅不爲風惟覺烟霞皆繚繞誰知巖岫本玲瓏山中靉黳原無盡但近西湖便不同

柳浪聞鶯

碧柳藏鶯最有情繞枝細囀更分明
驚開密縷千回巧飛破清陰幾處聲
林外依依歌乍起水邊恰恰雨初晴
金衣不是鴛鴦侶何向春隄浪裏鳴

花港觀魚

三月穠華對畫樓半湖儵鯉其沉浮
偶隨碧浪洋洋去競現金鱗潑潑遊
滿目波光搖曲檻一竿春

色繫輕舟幾聲漁笛西冷外可惜桃花逐水流

麴院風荷

小院清閒晝刻長荷花滿沼夏風涼千枝齊颭頻
翻露一片輕搖暗送香翠蓋倒垂低淥水紅衣亂
落怯斜陽金沙澗外朱華好猶說當年舊麴房

平湖秋月

孤山南畔小舟過秋滿平湖月色多千頃寒光開
玉鏡一輪素影漾金波微風不動涼如此清露橫
流夜若何比似虛明仙境界除非天上是銀河

南屏晚鐘

南屏暝色隱香臺閒聽鐘聲次第來逸響已隨暮
烟起餘音猶勒落霞迴迴非湖上笙歌意不是城
中鼓角催彷彿玉壺傳晚箭朦朧樹影月輪開

三潭印月

潭水清冷皓月懸俯看素魄落深淵一輪共照珠
光滿三塔平分兔影圓寶鏡生輝雙面合玉盤散
彩四圍連印來豈止西湖水千里臨流有萬川

雷峯夕照

唐詩卷之四
西泠西畔舊雷家廢塔凋零夕照斜一角紅雲生
古艷半空青影帶殘霞高標疑著金泥重絕頂偏
宜碧樹遮愛爾千年湖水上不加修飾自清華

斷橋殘雪

舊跡孤山有白隄雪消來過小橋西不飛絮影三
分白但襯沙痕一抹低輕暖乍堪泛吟舫豐年還
與祝耕犁九年住看西湖雪深感
皇恩句共題

竹

雨洗扶疎影風搖淡蕩陰拂雲分細節掃月抱貞
心點點湘山淚泠泠嶰谷音平安應有意莫遣報
書沉

柏

古柏亭亭立經冬不改容枝堅青更重勢老綠偏
濃溜雨圓如蓋驚春矯若龍西樓簷檻外閑伴兩
三峯

憶曲阜兼懷甬東

常爲思親意黯然雲山千里隔遙天昌平聚首知

何日姊弟分襟又數年幾度夢魂來枕上一番詩
思對鐙前連朝更望平安報夫子在寧波督勦海盜多少愁
心兩地牽

因安女作詩甚喜口占

弱女嬌癡才七齡依依文字漸分明若教汝是奇
男子必定清才似父名

夜坐

重簾不捲小齋深官漏聲多停素琴六尺紙窗紅
燭冷共君海上歲寒心

唐宋舊經樓詩稿卷五

阮孔璐華經樓

己巳元旦試筆和韻

曉色映春臺和風入戶來依依寒漸減拂拂暖初
回瓶裏金幡穩衙前畫戟開品茶閒話久兒女共
徘徊

初春卽事

輕雲淺抹暗斜陽乍暖還寒晝始長幾度東風吹
紙閣一番春色透書堂小桃未放微微絳弱柳將

舒淡淡黃如此韶光看不定莫教便換木綿裳
歸寧曲阜留別書之宜人

今歸闕里正春初滿日和風柳欲舒最喜昌平重
聚首更懷閩友暫分裾小窗剪燭思詩話官舫抽
帆自讀書此去別君君自重常將鱗羽問何如

月莊古霞賦詩送行以此答之

省親卽日別杭州一路桃花足勝遊但寫新詩
頻寄我休縈離緒懶登樓暮雲吳岫停吟館春水
邗江送畫舟囑語不須時悵望依依聚首待深秋

舟中卽事

東風淡蕩布帆輕川上新波似鏡平幾日櫓聲人
已遠一番春色雨初晴虎邱寺外雲光暖鶯脰湖
邊詩思清回想衙齋多韻事有人花下聽流鶯

舟中偶成

新詩寫就倚篷窗青染遙天映畫艫一夜姑蘇城
外住東風吹我渡邗江

遙望青山入暮雲閑同兒女話家人露筋祠外輕
舟遠小別衙齋又二旬

湖光瀲灩淨無塵
帆影參差柳色新
遙計南池何日到
故鄉應已識深春

闕里夏日應 堂上命作

依依姊弟話當年
得侍椿萱心共歡
昔日鵲鳩歸泗水
今朝鴻雁聚河干
相過庭院情皆洽
偶校詩書意更寬
爲說吳山風景好
却來尺素報平安

夏夜

銀漢無聲秋意長
碧天如水月如霜
風來才覺紗厨透
人靜還憐竹簟涼
寂寂簾櫳重見影
森森書

卷暗生香流螢欲照詩中字
數點青熒到曲廊

桂花

中秋人意爽
樹外月光移
簇簇黃金粟
層層碧玉枝
小山千里憶
老榦一盆奇
靜坐聞香久
悠悠更賦詩

題袁母竹柏樓圖

墨雲暗小樓
四圍皆竹柏
樓空人已歸
夜烏啼月魄
竹有筠如霜
柏有心似石
一樓十五年
三遷不移宅
清節比樓高
巍巍同百尺
展卷仰遺徽
彤管

標瑤冊

八月十八日蔡逆就殲于浙海温州二十二

日夫子交印入京祝

嘏曲阜聞之却寄

浙洋蔡逆忽成擒山左遙遙聽捷音七載瀛舟今始慰報

恩方不愧于心

哭二弟婦康宜人

一家哭汝淚如泉展轉傷心夜不眠智慧半生成

夢幻只餘共說此人賢

詩魂一去豈能歸書卷輕衫剩繡幃最苦嬌雛不知慟才勝二尺小麻衣

問安侍膳奉雙親平日依依本性真試看高

堂悲入骨更知真是孝親人

一卷丹青寫玉顏悼亡人自泣魚鰈應知地下傷心事猶念翁姑兩鬢斑

京邸春日寄懷書之宜人

小住京華憶選樓十年踪跡雪鴻留雲山滿目遙

相望歲月關心去始愁幾度夢魂縈闕里數行詩
句寄邗溝囑君珍重休惆悵聚首還當待仲秋

唐花

瓊枝小盜早安排二月東風尙未來忽見芳華迎
紙閣不知寒色滿金臺春光先借千重艷節氣無
分次第開鑪火書帷留衆影何須陌上看花回

題鐵師母如亭主人吟餘習射圖

老圃多清閑疎軒接茅屋繞屋多蕉桐漪漪倚修
竹端居遠避塵有如在空谷經傳宣文君絳帳啟

賢淑聯吟復賡韻風雅見嚴肅庭前清陰滿紅葵
花盡蜀有時共習射更命僮與僕女僮奉弓矢穉
僕整翠鵠欣然不在中有詩還其讀借此運甕勤
加餐一飯足我昨拜師庭慈訓何溫煥敬題圖冊
中韻事開尺幅

鑪香

金猊香細最悠然鼻觀微聞得淨緣如夢還疑更
如影非雲莫訝亦非烟清光繚繞虛窗下暖氣溫
磨小閣前紅袖女奴管書卷重教添火試龍涎

古鏡

閒來博古晚窗晴看到青銅倍有情開匣忽疑仙
鳳舞掛臺應見舊人銘一輪秋月寒光滿六月冰
盤暑氣清問爾菱花何代物只能寫影總無聲

書燈

青燈隱隱夜初長願借丹心對畫堂最喜清輝分
筆硯絕憐素影付文章時隨藜閣催寒焰閒伴芸
窗吐寸光不用銅荷照歌舞一生常自染書香

硯屏

一片玻璃製造奇橫來硯側最相宜圍如密室迎
書案射得虛光入墨池素彩重翻波倒漾青燈對
照月低垂分明六曲花臺鏡但寫烏絲不畫眉

筆格

一枝筆格傍書帷中矩原來不中規但使分行縈
翠袖頓看落紙起烏絲縱橫略似紗厨影正直還
同玉尺持物格要須先格物管城毛穎可曾知

茶甌

盧仝七椀儘人誇自把磁甌試露芽緩緩蓋來舒

嫩葉深深盛處起輕花面浮縵影迎看動底有微
温著手拏憶得東坡吟北地定州紅玉趙州茶

穀雨日憶文選樓牡丹兼寄書之宜人月莊

女史

選樓春雨暗斜陽百朵名花石砌旁遙憶風前翻
玉佩應知月下舞霓裳羨君坐賞無雙艷念我空
懷第一香回想家園春似錦定多詩畫滿蘭房

春雨

長安春暖百花開盡日風吹九陌埃正是惜花心

事重西山涼雨潑空來

春夜

留香小室偶徘徊還向鑪山炙麝煤詩句每從閒
裏得筆花豈肯夢中開半窗燈影人初靜滿院清
陰月乍來簾外春風闌不住無端玉漏又頻催

詠唐貞觀塗金阿彌佗銅碑

一片金碑貞觀年黃金塗滿至今傳碑高但有三
寸許額上雙龍盤蜿蜒古人製造精垂久摩挲終
日不釋手趙婆長孫共願成一千餘年金不朽慈

風慧日靜無塵佛像依然法界真一片妙明光射
目黃金曾照初唐人初唐褚公工染翰此碑字體
宜珍玩日月當空已入宮空使忠良發悲歎

題古霞女史暗香疎影圖

披圖小坐夜迢迢一幅瓊枝仔細描似有香痕浮
短几好同素影照輕綃卷中詩意何閒淡畫裏梅
花欲動搖疑是羅浮明月下詞人仙夢入清宵

暮春

暮春時節小齋深春鳥聲多停素琴幾處落花堆

碧砌一番飛絮出芳林簾前漸覺清陰滿牕外遲
看日影沉到底燕京風色緊晚來猶有峭涼侵

過瀛臺

金鰲頂上勝蓬萊路轉沙隄眼界開四面綠陰圍
玉檻兩湖碧浪湧仙臺重重宮殿春風暖隱隱軒
窗樹色催此是

紫宸臨幸處過橋車馬莫遲迴

借居冶山大弟公邸補種花樹偶成

虛庭自幽做依依百笏寬我弟湯沐宅借居聊盤

桓堂前有古槐綠陰影團圞夫子愛花木橐駝種
此間新槐出檐際垂柳拂闌干紫藤雜丁香還倚
竹數竿海棠最媽姹桃杏何攢攢雖未成老圃却
爲憶杏壇春深雨漸多日日對花看待得三五載
羣卉皆可觀出遊已十年復來住長安開軒惟把
卷詩多識心閒

曉起憶揚州

連朝初見雨霏微綠樹成陰燕子飛回憶墓田千
里外夜來魂夢到柴扉

爐烟裊裊出幽居心到閑時小坐餘自怯身孱無
別事窗前隨口課兒書

偶成三分卮字詩

三分者以第四句首字分
三字爲第一二二句首字
也卮字者以二十四字寫爲卮字以第四
句首字爲卮字之心第一二二句首字亦
從中心分出共二十
五字爲七絕一首也

木香亭外夜猶寒小坐書窗聽漏殘月色一輪照

花影梢頭蝴蝶夢漫漫梢字

三尺盆花照眼明人來小院得幽情日光暖透虛

窗外春鳥關關對樹鳴春字

木蘭花放小牆邊門外清香到案前東院梧桐西
院柳欄干都是碧雲天

欄字

高軒隱隱綠陰涼十二紗屏似短牆又是一年春
事了敲詩無耐落花香

敲字

送春

詩懷原不爲春憐送別心情竟黯然曲徑暗分紅
雨散小林初罩綠雲鮮韶光欲去判今日夏氣相
催又一年任是春深風景好也難留住落花天

立夏

夏來春去竟如何惜夏憐春此日過眼底韶光初
散落庭前風色尙清和每懷閨友新詩少遙憶鄉
園愁緒多綠暗紅稀窗檻靜衣衫將次著輕羅

京師首夏風景三首

處處槐陰綠滿遮六街新雨少風沙曉來未買新
蔬菜先買豐臺芍藥花

日暖窗前漸有蠅竹簾冷布一層層門前銅蓋丁
丁響已有冰車喚賣冰

庭前已不耐驕陽百朵玫瑰放紫香忽聽聲聲尖

入耳簾篷高搭半空涼

夏日偶成

連朝未得探詩囊幾許閒愁午夢長香篆似雲更
分影簾紋如水復成行蕉窗雨過悄悄靜竹徑風
來細細涼但覺空庭塵不到綠陰一片隔斜陽

和南池二弟偶成原韻

千里辭親別故園京華姊弟復盤桓一番離緒
同閑話幾句新詩得古歡聞道高堂共康健好
教子舍報平安知君不日官郎省喜奉

綸音仔細看

疊前韻再寄書之宜人

春明遙憶奉恩樓轉眼韶光未許留開盡好花
驚短夢摘來芳草助離愁殿春百朶圍仙苑弱柳
千條繞御溝我自懷君重疊句果然一日抵三秋

香絨花

誰剪香絨作瓣排一層花似兩層開鳳城四月春
還在插遍人家妝鏡臺

再咏香絨花

香絨花買種磁盆彷彿秋羅剪細紋疎影依依搖
瑣碎清芳淡淡散温磨也隨庭院凝仙露更與人
家壓鬢雲還共殿春花並放一般風色轉南薰

古槐

一樹槐能蔭一園直遮北牖接南軒遊蜂久戀千
花密靈鵲來巢萬葉繁此槐中有蜂窩上掃徑清
有鵲巢已十年矣陰香有迹入簾晴翠淡無痕上公庭下何時種三
百餘年舊托根

新竹

檻外新篁三兩叢出牆嫩葉已葱蘢時聞清響風
猶細乍展輕陰綠未濃小徑分開香淡淡數竿穿
破草茸茸仲姬妙筆如相肖應染斑筠潤管彤

蘭草

卽古之都
梁草也

都梁名識久莖紫葉猶青湘水滋芳畹和風香袂
亭彈琴思雅操綉佩散清馨我魯多幽谷何須說
謝庭

棗花

初夏棗花放枝高接畫檐榮華未纂纂古樂府云
棗下何纂

纂榮華各有時香蕊已纖纖安邑休千戶沉薰妙一簾似
蘭還似桂金粟笑堪拈

咏涼棚

涼棚風景又今年數丈長繩著意牽一片頓收紅
日影半空如接碧雲天低隨簾角垂檐際高與槐
衙蓋屋邊每到晚來平捲起夕陽西墜月光圓

雨過

雨過涼生便放晴風來頓覺葛衣輕穿簾乳燕頻
窺影敲戶新篁漸試聲窗有緝編人意靜庭多綠

樹午陰清日長更覺閒無事小炷添香向石枰

夏夜

曾記送春風春風不肯住此日來薰風薰風又一
度槐陰密密遮書堂夕陽隱後浮燈光露中新竹
如荷香月來搖影虛窗涼銀漢無聲向西繞一點
流螢落書小

坐月

捲簾閒坐夜悠悠小院風清螢火流剛見月來藏
樹裏霎時已出樹梢頭

月莊女史寄詩依韻答之

千里江鄉萬緒紛
讀君詩句更懷君
關心惟有夜來夢
舉首忽停天上雲
疎雨未堪愁裏聽
清吟如向紙邊聞
京華雖是風光好
但少揚州月二分

京邸六月天氣甚涼口占寄揚

誰道京華六月時
袷衣錦褥未能離
却如邗上新秋後
但少桐枝與桂枝

夏夜寄書之宜人月莊女史

皎皎明月照槐庭
槐庭月影上窗櫺
窗櫺掩映夜

色青碧紗點點明
飛螢飛螢宛轉來
鐙畔風清清兮夜
將半每爲竹西懷
故園文選樓前書
滿軒詩人聯吟坐
清夜苧衫蕉扇同
消夏我今遠隔水
雲鄉幾度愁心明
月下

風雨夜晴又寄

忽聞窗外風撼竹
密雲頃刻壓高屋
紛紛沛雨流飛塵
此刻驚歇吟詩人
詩懷偶斷愁亦斷
爐香茗椀在書案
雲開天朗雨亦停
習習清風到庭畔
銀河淺淡露華清
月影移來窗外明
依稀揚州夜深

景迢迢千里夢來醒詩人樓上同此情吟罷閒看
碧梧影

重過瀛臺看荷花

又向金鰲望玉京芰荷十里是蓬瀛紅蕖開作香
天遠翠蓋鋪成綠地平水泛閒汀容鷺浴風吹清
氣送人行樓臺多少方壺島四面僊雲繞鳳城

感懷

鳳城風緊未能禁不捲重簾對素琴靜裏暗思淮
海事一番愁緒一番吟時聞水漫
高家堰

虛齋小坐意沉沉身到閑時病又侵鎮日愁懷無
可語故園千里最關心

和書之宜人原韻

時光催短節兩地每心懸懷友吟詩少思鄉看月
圓茶香浮案上爐火對窗前把卷手還倦病多還
自憐

昔都下盛傳有仙龍鬼蝶四題因賦之

仙

仙家聞在白雲端來去無踪路縹緲已養丹砂成

寶籙還騎黃鶴對松巒蓬萊鼓浪遊春島星斗搖
光落夜壇自是世人皆俗骨八公雞犬未曾看

龍

蟄啓春陽夏氣回老龍驚起海波開却從渤澥翻
天湧更助風雲動地催洗甲還添三尺浪騰身但
借一聲雷古書神物誰能見惟此曾經共見來

鬼

死後終教百慮空一生何苦太匆匆人間頗有好
明月世上須爲畱古風若念子孫猶未歇比於仙

佛可相同千年多少彭殤事魂魄皆歸黃土中

蝶

簷外風和雨乍晴一雙蛺蝶繞軒楹若同乳燕衣
尤麗好擬新蟬翅更輕栩栩曾通莊子夢翩翩還
得魏收名滕王妙筆分明在可是羅浮看化生

題家鄉圖冊八幅

選樓巷家廟

家廟選樓巷修祭敬四時蘋蘩我當采誠潔盡孝
思門前森古柏檻外立豐碑惟望子孫好讀書知

禮儀

隋文選樓

隋代舊樓基重建新樓屋縹緗六萬卷金石二千
幅勝日偶登臨風景頗清目莫當小園看惟應勤
誦讀

雷塘墓廬

雷塘有墓廬 先隴在此間松柏鬱蒼翠墓門清
晝閒哀哉思 親意倚廬淚潛潛未能長居此思
之爲愁顏

湖橋墓祠

湖橋我家祠念此心耿耿古墓多松風遠遠搖清
影橋下接平湖漁家有小艇日落歸祠堂此意惟
靜領

珠湖草堂

湖莊舊遊處草堂占百弓山色接小樓波影渺長
空雜樹清渠抱魚鳥自西東爲憶鄉園遠圖之尺
幅中

曲江亭

曲江對焦山亭外萬桃柳黃鳥亂飛鳴我昔偕詩友
謂黃淨因夫人及王氏諸女史烹茗坐談詩日暮又分手今日
憶滄江勝遊惜難久

海岱庵

慈姑昔所居我改海岱庵夫子誕生處思親常
憶談慈親昔禱祀一一修神龕旁亦設親主

焚香淚暗含

龕列碧霞元君觀世音菩薩天后神位

琅嬛仙館

仙館自清幽巧借琅嬛字詩書萬卷藏竹西鄙歌

吹雖未如茂先夢中來福地或問讀何書幾篇博
物志

唐宋舊經樓詩稿卷六

阮孔璐華經樓

元旦懷書之宜人月莊女史

爐烟繞袖坐幽居柏葉重添餞歲餘兩度韶光寄

鱗羽

予與書之月莊一別二載

一番離緒校詩書風搖綵勝浮

琴幌日照梅花淨綺疏我在京華相望久征帆早

發待何如

古霞女史作烏絲欄並成清詠因題一律

幾日窗前陰又晴烏絲製好寄幽情頻量玉尺分

行細碎剪鉛刀落紙輕愛爾心中能正直憑他筆
底自縱橫何須刺繡誇工巧要看新詩共寫成

春夜寄懷書之宜人月莊女史

焚香小坐夜迢迢試把新詩寫寂寥燈影參差梅
影瘦其來窗上伴清宵

簾外春寒漏更遲一鈎斜月影頻移我今爲憶江
鄉事倒檢前年邗上詩

鄉書寫好又開封祇恐匆匆語未終多少愁心難
著筆默然都在不言中

香消燭燼意徘徊但覺流年暗裏催休使主人時
悵望屬君早向鳳城來

清明過萬柳堂

雨餘春曉碧城邊萬柳堂前景物妍一笑桃花爭
破霧初栽柳色試含烟高樓日映雲光靜曲水風
吹波影圓况是清明好時節不寒不暖艷陽天

藤陰和書之宜人韻

湘簾微度午風輕紫雪飄殘雨乍晴滿地濃陰生
夏意半窗疎影散幽情原知花謝香痕減却得雲

深露氣清試看驕陽收拾去晚來月印更分明
書之宜人月莊女史攜兒女來京喜賦一律
久別相逢一笑看閨門骨肉又團樂勞君二載持
家計與我今朝說古歡膝下嬌兒皆長大江南新
竹盡平安此番永在春明住三友冰心寫歲寒

附錄和韻

劉文如書之

骨肉相逢急急看堂中聚首話團樂商量閨閣
心同盡檢點琴書意共歡明月照君懷選巷春
風送我到長安人間行路真難事兒女嬌痴幸

未寒

上岡新居小園偶題

幾回小住鳳城邊此處園林又一遷行李勞勞來
僻地松篁槭槭接晴天濃陰滿院流雲靜空翠當
軒瘦石穿廡下未能親井臼鹿車常自愧前賢

代夫子爲人題墓田山水卷子

不少邗山好墓田白楊風雨總淒然若能巧得佳
山水華表歸來鶴亦仙
莫營園榭莫求田但結菴廬傍墓阡此是讀書人

本色管教碑碣立千年
墓田須賴後人賢孝子深心到九泉
世世讀書修丙舍便成第一好牛眠

代夫子爲人題中書菊隱圖

秋風落葉涼斜街去年排闥登高齋
菊花萬朶滿瓶盞清霜暖日爭窗階
主人雖官門下省終日對花弄秋影
一年心事菊花中朝荷鴉鉏暮汲井古
井無波花淡泊主人惟有東籬樂不須
捷徑指終南爽氣西山滿城郭

暖室

簾幕垂垂思悄然偶成詩句墨輕研
安排暖室焚香處穩趁寒雲釀雪天
栗烈何曾透窗紙温磨正好襯書氊
此間坐久渾忘寐那管階前刻漏傳

上巳日隨嚴慈過釣魚臺

釣臺遙望似瓊樓

鑾輅曾來此地遊日麗西山春色暖
風回靈沼浪花浮草痕淺淺初畱馬
柳影毵毵欲拂鷗况是今朝逢上巳
慈顏歡喜禊同修

哭父六首

數行血淚溼麻衣痛失嚴親去不歸從此終天
成永恨心驚何以慰 慈闈

更慮 慈顏病未痊黃昏伏枕淚如泉窗前一夜

瀟瀟雨數盡殘更伴 母眠

宦遊京邸更同居手足相將二載餘屬弟今朝無
別語閒來珍重讀遺書

昏昏無語憶當年此日偷生倍黯然痛想 父言

猶在耳提攜親授國風篇余幼年先君口誦國風指而言曰願汝他年

能知此義哀哉

上公大弟守鄉園聞耗驚來慘斷魂千里扶棺歸
闕里自言未得報深恩

姊弟分襟心更傷如癡如夢意徬徨掛帆又向淮
南去回首白雲空斷腸

淮陰節署答曲江亭諸女史

曲江亭外別多年一片雲箋到眼前詩句細吟春
正午桃花遙憶雨餘天江湖宛轉連明月焦麓空
濛起暮烟何日再同亭上坐綠楊深處繫輕船

有感

人生最是感流年况又思親倍黯然闕里未歸
心欲碎淮南小住意常懸雲山迢遞迷洙水魂夢
淒涼繞墓田刻漏無端頻聒耳醒來猶自恨終天

上元日秋菊數枝與春蘭同供

上元風景早春前移得東籬近硯田猶有金英迎
淑氣竟將春色接秋天傲來那解雪霜淡放處相
看燈月圓况與幽蘭同供養此花真是號延年

雪後早春

雪消晴日意徘徊又見東風一度來雲色乍開寒
乍減冰花初破暖初回隋隄路近將舒柳官閣人
閒欲詠梅待得梁間新燕至更看飛絮繞樓臺

春寒

時逢二月尚餘寒捲起重簾怯畫欄幾剪東風分
翠袖一爐温火藝香檀茶烟輕颺書窗靜花樹平
移日影殘料得杏林紅未放漫將春色惹人看

春草

淮南春色入東風一片平蕪二月中低接池塘新

水綠遠分村墅夕陽紅儘教采采成香佩莫遺勞
勞作轉蓬自有芝蘭在幽谷枯榮未與衆芳同
空庭一抹碧迷離亭外階前到處宜點點溼沾紅
雨散萋萋低接綠楊垂春光荏苒隨南浦烟色蒙
茸繞謝池休使閑愁驚遠夢聯吟且是踏青時

憶曲江亭春柳

韶光應滿曲江濱垂柳千行綠已勻裊裊定含三
月雨毵毵又換一年春風來水榭鶯聲滑月到柴
門蝶夢新我欲放舟亭外去再尋林下詠詩人

春雪

雪光掩映碧窗紗幾度東風素艷斜細糝苔痕縈
曉徑亂翻水縠向春沙暗通暖意消寒意先破梅
花到柳花樓外何須垂玉筍一池新水且烹茶

寄答曲江亭諸女史卽和原韻

江臯春色早芳景亦已衆遙憶諸詞人清吟如嘯
鳳念我滯宦遊空作曲江夢惟有托詩篇乘風一
相送

春雨

唐詩卷六
絲絲裊裊復霏霏斜撲簾櫳力尚微溼透杏花春
已艷染勻芳草綠初肥池塘添漲扁舟泛庭館無
聲倦鳥飛欲上小樓間望遠雲烟一抹鎖晴暉

常州旱阻改向江行向江西

迴橈轉過潤州邊浪闊風高又放船曉色蒼蒼隔
瓜步秋光渺渺動江天蒲帆勢峭人皆怯畫角聲
催夜未眠休問今宵何處泊西風蘆荻總蕭然

過小孤山

孤峰高聳大江中千里岿巖插碧空潮撼洞門光

隱隱日曛雲樹翠濛濛幾層檐影圍僧院一棒鐘
聲破晚風果有彭郎曾贅否推敲字意未相同

望大孤山

南湖又見大孤山風定波平望眼寬岩岫玲瓏蒼
嶺外樓臺綽約白雲端從來大澤居陽鳥應有飛
仙降彩鸞我自泛舟江上望宛然疑在畫中看

中秋彭澤望月

秋江風靜夜停船正值中秋皓月懸光射波心銀
漢淨影登天外彩雲圓人來彭蠡方今夕地有淵

明憶昔年若向折腰求好吏陶公當日不爲賢

登滕王閣

芳洲舊館重徘徊千里江山眼乍開簾捲西風搖
傑閣日曛潭影擁仙臺鬪雞誤入諸王第飛鷺能
傳不世才却嘆地因人更重遊人半爲子安來

遊百花洲

名區久聽百花洲今日真來作勝遊山外雲霞林
外寺城中竹樹水中樓秋生兩岸塵如洗漲滿平
湖翠欲流十二紅欄闌不住夕陽橋畔起浮鷗

講武高堂久廢荒年來修築小隄塘竹籬宛轉秋
藤瘦疊石玲瓏晚菊黃隱士祠前埋鼯鼠洪家宅
外近滄浪西風蕭瑟且歸去好待春來問衆芳

題長媳澗芳畫山水小幅

半幅生綃好畫圖氍毹高樹影模糊分明一段江
南景水碧山青似此無

遠岫層層天半斜濃雲深處有人家夕陽橋畔無
人到四面嵐光接水涯

蕭蕭荻葉半經秋畫裏溪山足勝遊如此空林人

意靜不聞漁笛送輕舟

筆底縱橫絕點埃詩情畫意本天才試看六法分明在寫出倪黃山水來

和書之宜人原韻

昏昏無語怕登樓腕倦拋書倚案頭几上琴絲皆歇手囊中詩卷可消愁雲光滿目千山遠夜寐思親一夢投偶和瑤箋吟苦句使人感慨使人憂

冬夜

一鑪溫火透幽居簾幕垂垂意自如坐久不知寒

氣重教兒且讀晚窗書

玉盞茶香最有情燭花點點落長檠簷前一夜朔風緊半是鐘聲半雁聲

閒襲芸香夜已闌虛廊人靜小樓寒盞中菊影移燈影照入書窗耐細看

時光催促寸心懸物換星移又一年回首思親無限夢二千里外隔江天

和夫子冬至雪窗原韻

持節洪都日官清耐歲寒軍威皆肅靜民業共平

安臣力原當用

君恩欲報難

夫子到任甫及一月即發餘干逆案不致日久成事多害生民仰蒙

聖恩賞加

太子少保並

賜花翎又

上諭內云去歲林清一案如能似此早辦何致釀

成大事

聖諭諄諄特此書誌

已消乖戾氣瑞雪壓闌干

偶成

史書流覽最相宜古事皆如一局棋強手自能贏

弱手幾人聰慧幾人癡

筆硯閑閑絕點埃書窗人靜重徘徊未知一日愁

多少詩句還從夢裏來

疊冬至雪窗原韻

容膝圍爐火窗深未覺寒思

親腸欲碎願弟病

全安夢裏鄉心遠愁中詩思難嶺梅今已放折寄

雪偏干

再疊前韻

時逢三九候雪緊小樓寒年稔家家慶心清事事

安風敲竹韻淨路隔雁書難坐久重賡句憑君綵

筆干

題長媳畫小孤山圖

綵筆摹成似也無生絹半幅一山孤參差雲樹隨
心出浩渺烟波拂指塗硯上擘青翻石壁閨中展
卷現彭湖宛然一段西江景多少新詩半畫圖

冬日

連朝天氣冷風景透軒楹寒向雁邊落霜從瓦上
清校書嫌日短試墨怕水生寶鴨焚香後氤氳最
有情

冬夜

重簾不捲峭寒生官閣人閑對短檠經史未明常

歉意鄉園遙憶最關情階前月影移簷影樓外風
聲雜漏聲一縷鑪烟消夜永拈將詩意共茶評

讀明婁妃墓碑感賦

妙詞無數弔貞魂六尺豐碑今尙存讀罷真知明
大義淒涼長伴月黃昏

賢妃雖死却如生一片冰心似水清慚愧寧王是
男子婦言不用反傾城

遊百花洲聯句

沙隄高柳受東風景與官齋自不同四面湖光孤

嶼外樓經一春詩思百花中雲窗虛拓苔岑小古水閣遙分竹徑通曲折迴欄皆倚遍安欲歸還戀夕

陽紅古霞

中秋

小住章江又一年月逢午夜更團圓風來東閣金波靜露滿西山玉宇寒天上清光同皎潔民間和氣共平安惟憐此夕通宵坐回憶文樓仰面看

擬元人梅花百詠之十七首并序

四庫未收唐宋元遺書不少夫子采訪一

百餘種進呈

御覽乙亥夏在吳中鈔得元板元韋珪梅花百詠

一卷前有楊鐵笛序讀之甚爲可喜但其詩皆是七絕官齋清暇約同閨友三人暨大兒婦六女共六人依次分題各詠五律十餘首其成百詠詩成又互相商量改正鈔寫排成一卷較之元人未知能否相擬也時安女學詩初能吟詠請名其書齋卽名之曰百梅吟館焉

庭梅

虛庭梅已放玉樹又今年近在碧階下如臨綠野
前簷風浮淡淡簾月照娟娟一片清溫意芝蘭子
弟賢

溪梅

但覺春風暖溪梅破綠痕人尋橋上樹鳥度水邊
村波影浸花影冰魂繞夢魂扁舟誰載酒一棹散
溫磨

探梅

欲訪春消息南枝應發芽淡痕尋水榭暖意問山
家幾處將殘臘何時始著花相思復相訊竚待月
光斜

賞梅

最喜梅開後披風坐小林向他重覓句伴我細彈
琴省識春風早相將夜色深誰將一杯酒澆此歲
寒心

浴梅

瓊花瓶裏供汲水耐頻添密灑凝花面輕攀拂指

尖香清涼翠袖色淡淨牙籤浴罷還憐汝休教塵
俗沾

粧梅

壽陽曾點瓣千載試梅粧御苑眠春色天階送夕
陽圓遮眉外翠疎帶額邊黃莫遣塗鉛粉但思清
夢長

雪梅

窗前搖玉樹帶雪耐頻看但見南枝放何殊北地
寒氷花分細蕊臘意壓迴欄初日東風暖香生凍

欲殘

烟梅

萬樹梅花影空濛路欲迷孤山朝霧薄鄧尉遠雲
低香淡塵先淨風來鳥暗啼深林人未到一抹畫
應齊

寒梅

花氣衝寒候梅開三兩枝臨風含素雪破凍耐氷
澌香重何須酒衣單儘咏詩若非經絕冷品格不
爲奇

咀梅

試採梅花瓣餐英意自如折枝須玉破沁齒惜香
餘和味思商鼎閒心讀漢書一般清趣好勝點菊
苗蒞

西湖梅

雪後西湖路梅花在六橋香光浮細細山色襯迢
迢共鶴招清夢依松發舊條南冷開更早十里淨
塵囂

東閣梅

官閣梅初放春光自不同二分明月下廿四古橋
東臺外枝迎客堂前香滿風當年何水部詩興在
花中

僧舍梅

梅發山僧舍偏宜雪後晴六根塵欲淨數點悟還
生惠照鐘聲遠雷塘花影橫我家墓門樹淒切憶
邗城

道院梅

道院梅千樹林深苔自肥開逢丹竈冷落共白雲

飛枝老依孤鶴壇高視夕暉遙知步虛後明月送人歸

擔上梅

遊人山外轉擔上繫瓊株顛倒隨琴劍縱橫入畫圖一肩香隱客十里趁樵夫歸去問城市銅瓶挿此無

杖頭梅

何處吟詩叟梅枝繫杖頭不須驢子背還上酒家樓拂袖香光轉扶童花影浮青藜開玉蕊相伴有

春鳩

玉笛梅

五月江風暖笛聲吹落梅夢殘明月下香散白雲開畱得一枝在休教三弄催倚樓人悵望黃鶴幾時迴

福祜禱三子夜課詩以示之

沉沉官閣小窗東屬語嬌兒苦用功願汝能知書味好他年可守舊家風

風吹梧竹靜幽情燭影搖窗月又明最好晚來開

夜課漏聲相和讀書聲
學詩學禮自修身手足相和更侍親稼穡艱難寒
士歎世間多是苦勤人
汝父宦遊勤國事軍門整肅似冰清囊中只有書
千卷惟望他年爾學成

冬夜

官閣沉沉繡幕垂不堪愁緒復何爲思 親惟有
三更夢教子頻翻數卷詩兩地雲山人意遠一庭
霜月漏聲遲欲知拈韻消寒處閒撥金猊小坐時

題徐氏蘭垞孟貞兩陸孺人詩集

風琴真是女中師兩卷陽春白雪詞舉案昔聞共
裘褐授經還見敝書帷端因儒雅成雙配不爲清
貧那獨奇何日放舟林下過西窗剪燭細談詩

盆中白菊大如白牡丹名之曰秋牡丹

寒英皎潔玉無瑕移向盆中壓影斜疑是鼠姑開
未了秋深補放一枝花

題六女畫白菊

好把奇花特護持團欒如玉影垂垂欲將粉本題

詩句教汝殷勤寫折枝

冬日偶成再疊去歲雪窗韻

歎冬花發後風緊曉窗寒架上琴書靜房中筆硯
安人知官閣好誰識宦遊難年稔心方慰時週十
二千

接闕里家書知二弟病

鄉書驟到最驚情知弟身孱百感生剔燼青燈心
正遠數殘寒漏夢難成枕邊每有思 親淚

林外何曾送葬行

先公薨于京師 賜邸弟等扶
櫬歸里余由京隨夫子至淮南

漕院未得
送歸孔林

雨雪霏霏彭澤冷怕聽江上雁行聲

冬夜

詩書無窮難盡讀勤能補拙親卷軸自烹茗茗校
叢書窗外風聲撼修竹風蕭蕭兮起庭畔月皎皎
兮照書案雁聲嘹唳破行雲城遠星稀看不見終
日身安不敢安虛齋猶戀一燈寒夜來女課兼兒
課共把詩書仔細看

題靜春居詩卷

詩如水玉一般清寫出春光照眼明豈但謝庭風

唐書卷之六
絮句能傳班史漢書名書之熟于史書曾著兩蘭
閨唱和分新韻節署幽閒共古情惟望墨莊經籍
好諸兒次第學皆成

古霞唐慶雲校字

唐宋舊經樓詩稿卷七

阮孔瑤華經樓

畱別西江節署

二年節鉞住南昌今又攜家向大梁一片江天波
渺渺千重雲樹路茫茫襄河迢遞征帆遠秋水滌
洄宦境長如此光陰看不定漫將離緒寄維揚

江上阻風

連朝風阻又停船徹夜愁心未得眠但有波光邀
月影移來共照楚江天

山川雲影浸江流多少兒童繫釣舟官舍那如田
舍好西風漁笛韻悠悠
篷窗閒倚耐頻看風湧波濤眼界寬笑我宦遊無
定處心懸兩地未能安
碧天如畫繞城闌雲樹相連遠水閒風送布帆人
去也斜陽影裡過廬山

過潯陽古渡

舊志潯陽古渡頭我今何幸此閒遊江邊綠柳千
層繞亭下清波九派流風色暗侵明月夜櫓聲搖

過夕陽樓白公當日停舟住一曲琵琶萬古秋

路過漢江得遇七姑母相會片時回舟卽賦

一律

久別慈顏十七年

嘉慶三年子隨先君路過保定時胡太姻伯總督直隸子隨

先君到署今已十七年矣

心懸闕里話從前同懷歸思隔千里

遙望停雲各一天秋水平分武昌月夕陽斜照漢
江船相依膝下還相憶未卜何時再會緣

又疊冬日雪窗前韻

又是深冬至梁園雪後寒吏清人意好民靜宦心

安開卷重吟處濡豪欲和難年豐堪豫卜瑞氣映
河干

歸曲阜感賦

弱女今朝省故園銜哀五載話難論升堂但覺金
絲靜入室惟看木主存強慰慈顏開笑口偷彈哀
淚濕衣痕 嚴親若是憐孤子佑弟身孱祚此門

展先君封公墓

哀哉不孝女遠來展親墓傷心我 先君永舍兒
女去昔日女歸來定省朝復暮 嚴訓何諄諄憐

女每百顧持家訓節儉雖貴守寒素斯言猶在耳
朝夕時省晤今重歸闕里惟見墓門樹號泣向寒
天悲心結雲霧呼 親 親不應杳杳黃泉路衰
草滿長林淒然著霜露須臾日沈西何能佇此處
征車未久停欲行不成步

將之楚別 冶山大弟

小聚何能久今朝又別離依依腸欲斷耿耿語難
持對酒含悲淚停車寄短詞羨君能孝悌教子得
恩慈幾度關山遠三更魂夢知北風吹鼓角瑞雪

送旌旂魯國鄉心戀荆江宦轍馳何時重到此珍
重話南池

登黃鶴樓和古霞女史原韻

渺渺烟波暝色收登臨遙望楚山頭空懷鶴去千
年事但見人游百尺樓玉笛吹殘明月夜梅花搖
落漢江秋且將詩句酬佳境一派滄浪助客愁

附原韻

唐慶雲古霞

登臨懷古萬帆收芳草斜陽滿渡頭楚澤烟波
浮大別江天風雨會高樓雲中黃鶴千年事城

上梅花五月秋那見飛仙欄外過一聲玉笛不

勝愁

未夢中得前二句醒後憶之未忘此或心上之
事香事故得于夢因成一絕

朝罷歸來看落花銅鑪石鈔且烹茶依然五載前
頭事蝶夢園中是我家

嶺南除夕立春

爆竹聲中酒尾殘燭光人影話團圓香消栢子臘
初去梅破春旂夜已闌海國波瀾皆晏靜

天家寰宇盡平安年年沾得
君恩重正好風清度歲寒

前附和韻立春

唐慶雲古霞

同到羊城冬又殘喜逢佳節坐團圓
幾番雨送春無賴第一陽回臘漸闌
寶炬影開金鏡朗梅花香重玉瓶安
今宵暖與中秋似桂馥桃紅竟未寒

五兒婦初來粵書示大兒婦兼寄外粵西六
首

從來姑婦最關情嶺外梅花又遠行
接汝音書如見汝開函頓覺別離生

喜看新婦性從容才德依然與汝同
詩禮分明兼質慧幽閑不愧舊家風

書窗又見月黃昏靜裏頻思闕里門
回憶故園悲舊事慈親膝下未生孫

星移物換又年年遙憶長安路七千
粵海風和花氣暖念兒待漏雪霜天

心懸重望蕙蘭開待得春深雨後栽
惟願庭前多

並蒂便中早寄好音來

向平餘事且休論兒女嬌癡亦費神家自平安休

內念一心純用作良臣

寄外

花影參差夜未眠別來幾月却如年已教兒女習
勤苦還指詩書說佞賢公事變遷常惻惻人情翻
覆自拳拳此心一片無私曲我自虛舟任觸船

病後憶

夫子廣西讞事兼閱兵

忽憶遠行客征帆不避寒勞勞勤 國事刻刻願

民安政績修身易人情化俗難囑君無別語瘴地
自加餐

接

夫子詩章頗多以此警孔厚

閒將近語囑兒知汝父辛勤久遠馳忙裡尙多吟
警句爾當竭力讀書詩

詠楊妃荔支事

荔支七日色猶新貢入驪宮第一人可惜千門遙
望處紅塵飛過起征塵

六女子歸口諭六首

愛女今朝遣嫁行關心骨肉訴衷情未知姑性嬌
癡慣願汝于歸婦道明

雞旣初鳴待曉粧晨昏侍膳奉高堂言如金石兒
須記非比閨中傍母旁

伉儷須和偕瑟琴當從當諫自驚心奩中惟有書
同畫那有明珠抵萬金

相和妯娌性溫存第一閨中要慎言奴婢寬嚴宜
好待休教人怕貴人門

克勤克儉戒奢華香伴詩書筆伴茶整理庭除尤

謹慎他時方不愧吾家

汝父勤勞公事忙官清惟愛一詩囊嚴慈心性皆
憐女不把嬌兒嫁異鄉

題女蘿亭圖

松蘿亭外綠成陰几淨窗虛小院深花榭風廊情
脉脉月臺雲檻影沈沈卷中人靜多新句架上書
香洽素心覽久忽疑仙境界蒼官玉女共清吟

蒼官蘿
名玉女

題

唐文苑英華卷七
賜珮軒白玉珮珮乃七兒婦錢德容被
賜之物

新婦侍晨昏向我堂前步鎗鎗玉珮聲玉美寶光
露我見問異珍向我言其故

聖駕幸五台先君扈

玉輅召見十六次奏對無錯誤玉珮

賜先君

黃幄親手付又知惟穉女

九重復面諭移珮

賜德容荷蒙

恩澤足我聞

天恩重指玉爲重語九齡受

聖慈此事難以遇淑女宜佩此精潔感

異數詩畫南樓傳汝當時省悟克勤未惜勞虛心
習家務幽閒亦能文憐爾比吟絮祐兒識金環室
中得內助閑時共風詩鳴璆有雅度瑤琨珍重藏
相伴朝與暮吉祥傳子孫

庇蔭永垂裕

喜雨

八夜瀟瀟雨秋聲助喜晴
拋書聽浙瀝欹枕數分
明花木添新澤禾苗望晚成
沛然甘澍至可以慰
蒼生

月莊女史攜兒婦孫輩移居小琅嬛以詩賀
之和 夫子韻

新修小圃學琅嬛
覓句揮弦在此間
詠絮昔傳才地好
飛瓊今合洞天閒
同居嶺表思鄉里
錯把官齋認故山
我有愁心亦拋去
抱孫一笑共開顏

種竹

移得瀟湘竹數竿
書窗栽處影檀欒
却因清晝風前聽
偶把閒情雨後看
花榭半庭皆洗淨
杏壇千里報平安
時接闕里家書
此君豈是繁華客
長抱虛心度歲寒

祝 承恩公孟夫人壽 承恩孟公住

森森潭府似蓬萊
整肅軍門畫戟開
梁孟齊眉趨御苑
芝蘭繞膝奉霞杯
感君雅愛稱良友
愧我清盟歎陋才
如此錦堂真福地
還從天上賜孫來

癸未正月二十日 夫子六十壽辰在兩廣

節院 夫子兼開督撫鹽關四印又蒙

恩賜福字加

賜壽字

開印逢祥四十年 夫子三旬開詹事府正堂印四旬開浙江巡撫印五旬開漕運

總督印即今六旬亦恰逢六旬福壽共團圞子孫

稱獻雙章瑞夫婦同偕百歲歡嶺表德風皆靜好

海天化雨更平安堂前纔拜

雲龍筆遊客還尋竹萬竿 開印拜 賜畢即避客自往撫署密竹林中

煮茶

夫子偶構聽雨小樓即賦一律

聊借堂西置小樓登臨多為雨相畱縱橫一丈如

懸榻浙瀝三更似泊舟閉戶鐙殘情脉脉凭闌漏

永韻悠悠雖然紅杏江南遠也有新花滿案頭

孟公公夫人終于廣州將軍署致祭感賦

聚首羊城何太遲忽然仙逝會無期兩年依袂頻

憐我幾度哭君惟奠卮悲淚難酬塵世願深情祇

有夢魂知軍門大樹還如舊誰料離詞即挽詞

唐詩卷七
和古霞女史木棉花韻

百尺修條雲底垂
木棉花放最高枝
影搖竹榭如排燭
霞滿書窗合賦詩
日色正烘亭午後
風光剛轉暮春時
若非海上珊瑚幹
也是崑山赤玉脂

附原韻

唐慶雲古霞

西堂慣見綠陰垂
今日花光忽滿枝
隔院鬧紅爭入鏡
過牆倩影索題詩
深含醉意東風裏
濃寫春痕夕照時
仿佛玉蘭高十丈
全將鉛粉換烟脂

春日攜五七八兒婦遊雲泉山館望白雲山
此是嶺南第一峯
雲泉瀑布響清淙
鶯聲宛轉松聲古
春色晴和水色溶
昔日仙人何縹緲
今朝遊趣共從容
只慚未得登峯頂
天外羅浮見幾重

示八兒婦

屈指宦遊幾度春
諸兒受室已成
人回思此婦失
慈母我更相憐
似女身
久識連魁世宦
門舊家風度又
何論閨中妯娌
能和睦堂上翁
姑有惠恩

須諫汝夫學業深

君親不負兩同心人言內助方無愧祇在持家不在吟

井臼何須要汝操且將書筭習勤勞能知稼穡艱難事方稱兩家門第高

授汝遺規數卷書汝家法語久名儒

婦祖彭殿撰著儒門法語

他年教子能嚴切一片真心肯相夫

秋夜寄外

自怯身孱力不禁重門深掩怕風侵砧聲易醒思

親夢蟲語常增憶女心案上鐙光青裊裊窗前月影靜沈沈聽殘官漏知多少書卷鑪香伴我吟

附和原韻

川途風雨最難禁轉喜新涼著意侵已越三千行省路幾忘一月離家心寄來詩句烏絲細想見秋軒綠影沈教子弄孫知是樂剪鐙聊復和清吟

寄外二首

研匣鑪香絕點塵時光又是一年新西風簾捲秋

唐文苑英華卷七
容淡檻外黃花憶主人
虛窗人靜影迷離重寄雲箋重寄詩書卷半開茶
半熟課兒豈厭二更時

夢孟公公夫人醒後感賦

多病心神倦夜夢尤覺奇閒步入空庭花榭影參
差人靜香縹緲月淡景依稀仿佛有樓臺清風拂
竹籬忽見孟夫人殷勤牽姊衣問姊何別久悲酸
意欲癡姊說女已仙此後切勿思我聞悲且喜誰
知淚已垂我女不我夢竟不念慈幃再問無一語

翩然催返歸攜手不放行慘然拂袖推驚醒在枕
衾汗冷如風吹披衣聽殘漏夜已三更時回思夢
中情所言豈有非吾姊性慷慨行止有威儀應已
歸仙班此夢無所疑傷心憶我女節孝兩相宜隨
夫棄塵世

張壻來粵舊疾復發卒
于督署女亦相繼歿

依然是齊眉生

前習閨訓轉令父母悲汝有詩畫才手足更怡怡
何事命之短未及報春暉產女未彌月嬌雛幼豈
知痛極心且傷神魂恍若離展轉夢不成飲泣記
此詩

公夫人初見吾六女神情若癡必欲認爲女
甚愛之及六女卒其僕婦始言夫人有愛女

以婉卒貌與六女酷相似
乃六女亦以婉卒奇矣

春日偶成兼懷闕里

原何小病似沈疴鎮日詩心變病魔借問梁間新
燕子選樓風景近如何

重門深掩怯春寒架上詩書懶去看鳥語聲多驚
午夢半庭花影壓闌干

一年風景一番新小住羊城憶泗濱寄語鄉園諸
弟妹同枝可念遠離人

慈親安樂久含飴笑看蘭孫習禮儀他日成名尊

祖訓莫將門第改遺規

古霞女史偕五兒婦雲姜遊唐荔園歸攜荔

支贈余以詩謝之卽和原韻

荔灣佳景未能尋見說紅雲簇遠林遙憶風光香
淡淡却逢雨意晝深深我懷闕里拋詩畫君賞名
園記古今試擘紺珠三兩顆聊將愁緒和清吟

附原韻

唐慶雲古霞

久想紅雲帶雨尋同來綠地看丹林繞亭萬顆
詩心遠壓水千株畫意深南國古園聞在昔晚

唐佳句得於今明年爾再攜琴到雲姜善琴清散應名擘荔吟

附錄和舅氏韻

許延錦雲姜

柳波雨後放蘭舸同看驪珠千萬顆鄭公隄上色猶新曹子墩前雲更擘摘將鮮荔擘輕紅畧識天漿風味可晚唐詩意滿西園歸來更獻連枝果

咏珊瑚帶鈎

連理珊瑚出海中天然螭樣自玲瓏何須異寶攢

輕帶但借奇材奪巧工彩服製成三寸結官齋買得幾枝紅諸兒束使宜勤慎手足怡怡共古風

新建學海堂

主人羊城節鉞久案牘終朝不釋手餘暇偶登越秀山擇得一峯地數畝畧加修築有堂臺海闊天空眼乍開夏木千章梅百樹登臨遙望興悠哉海山雲水搖清目雨過生涼清馥馥四面窗開日影稀雲樹相連滿天綠非為閒遊設此堂聊觀風景課文章從今佳士多新句萬卷紛紜翰墨香主人

素愛經與史欲美民風莫如此更助香膏命讀書
嶺南他日畱遺址吾家尼山雖最高無此海天好
山水

唐宋舊經樓詩稿卷七終



